



Malaysia Masters: Srikanth
quarter-i iogo

N. Korea warship sayadang timtem
ajuru, Kim-i keddangsür arütsü



Director General AR-i Nagaland CM ajuru



Director General AR-i Nagaland CM ajuruba noksa nung angur

Dimapur, Monupii/May 22 (TYO): Director General, Assam Rifles, Lt Gen Vikas Lakhera, AVSM, SM ajanga May 22, 2025 nü Nagaland Chief Minister, Dr. Neiphiu Rio ajuru aser Kashiram Basti, Dimapur semdanga Dimapur sector indang under command units tem inyakyim balala aser timtem ajuruba asadanga liasü.

Internal security kumzüka ayutsü aser North East nung tongtipang region nung tensa junga lidaktsütsü asoshi sepaitem renema aliba asadangtsü nükjidong nung pai item

tesemtem semdanga liasü.

Lt Gen Vikas Lakhera AVSM, SM-i sepaitem den sensaksem aka asr Assam Rifles personnel temi mapa tajung inyakba asoshi tenüngsang agütsü.

Paisa region nung tesunep alitsü asoshi saksalema alitsü aser civil-military tesendaktep tajung alitsü nüngdaker ta nenshia ashi.

Tarutsü nung operations palala takok ngua inyaktetsü aser kati ka dak tamang katapa alitsü asoshi Assam Rifles ajanga nüburtem den teka amteper inyaktsü temulungtetba nung lir, ta DG Assam Rifles ajanga ashi.

IMDH kisü-jensüba mapa nung AKM temulung masür

Dimapur, Monupii/May 22 (TYO): Mokochung nung aliba Imkongliba Memorial District Hospital (IMDH) Block A tang teyangludak aliba ya shidak meyanglur, anungji ki o jen meshidaki yanglua aliba meyanglushi tashi shiranger memungdaksütsü, ta Ao Kaketshir Mongdang (AKM) ajanga Bodhbarnü metetdaksü.

AKM ajanga tekeraba nung iba tesem meita reprangshimtsü asoshi 'independent evaluation team' ka tentettsü akhang aser Nagaland sorkar dang iba project shidak meinyakra contract agientsü ayongzüka liasü.

"IMDH ya Mokochung atema kisüng masü saka temeket nung aliba district tem asoshia tongtipang healthcare center lir, anungji ki o jen tajungtiba nung yanglutsü nüngdaker. Ki o jen junga meyangluba ajanga lendong timtem kar ajurura shiri khuret abentsü?" ta AKM-i ashi.

AKM keddangsür temi osangbenertem dena iba tesem semdanga mapang iba ki o jen yangluba nung amshiba osettsüset nung temulung masüba aser mapang tali agiba ajitet.

Parnoki iba tesem sema aodang ground floor nung top floor tashi concrete paksar aliba aser teka agi kongshinunga cement kakzüka aluba nguogo, koba medical facility asoshi lendong lir, ta AKM tir Lanutoshi Aier-i ashi.

Iba ki foundation timba

yangluogo aser yangji cement brand tamajung "SBM" amshia lir, koba Ao Senden-i May 2024 nung semdangba mapanga tutetja liasü, ta ashi.

Ao Senden-ia cement tamajung tekeraba nung melentsü ashi, saka tang tashi kasaji amshir, ta AKM-i ashi.

IMDH ya blocks tasen ana bendenloka 200-bed facility kumdaksütsü nükjidong nung project ya 2018 kum National Health Mission kübok sen 213.70 crore yong tender agüja liasü. KC Infra Projects Pvt. Ltd. ajanga 2022 kum iba ki o jen yanglu tenzüik aser mezüngbo iba mozüki ya March 2024 nung renemtsü nangzüik. Saka ano khen lir September 2024 tashinung renemtsü ta ashi, saka tang tashi merenemtetli lir, ta AKM ajanga ashir.

Mapa kera aser junga meinyakba tebilemstü lemsatapa AKM-i Director, KC Infra dangi September 14, 2023 nung shiti ka zülü, saka tanü tashi telangzüba mali, ta ashi.

Minister, Health & Family Welfare, P. Paiwang Konyak-i November 20, 2024 nü iba mozüki semdang dang Block A renemtsü asoshi ano sen crore 23 tali agütsütsü sangdong aser DPR nungbo ita 36 tsüngta renemtsü shia lir, saka yamaji meinyaktettsü, ta AKM lenirtemi ashi.

Anungji tarutsü nung lendong timtem majurutsü mechi sorkari tekeraba nung tapet mera agitsü akhanger, ta AKM ajangasa ashi.

Nagaland sorkari IAS officer Reny Wilfred suspend sütsüogo

Kohima, Monupii/May 22 (TYO): Nagaland sorkari Indian Administrative Services (IAS) officer Reny Wilfred mapang tatsüka asoshi mapa nungi anenja lir (suspend), shibai tim masüba mapa inyak ta sorkar mapa inyaker tetsür balalai tai tongloktsüba ken o bushisüngdanga mapang lir.

Nagaland Chief Secretary Dr. J. Alam, IAS ajanga All India Services (Discipline and Appeal) Rules, 1969 indang Rule 3 kübok sub-rule (3) amshia iba suspension order ya Bodhbarnü agütsü.

Wifred ya 2015 batch officer aser Nagaland cadre lir, aser pa ya Investment and Development Authority of Nagaland (IDAN) aser Finance Department nung Joint Secretary inyaka liasü.

Itasen timba kumtsütsü aser sorkar mapa agütsütsü aser item melen shi nung medemtsü Wilfred-i akhang ta sorkar mapa inyaker tetsür aikati tai tongloktsüba yong Nagaland State Commission for Women (NSCW) ajanga March 17, 2025 nü ken o benokba sülen pa khen

atema mapa nungi anenja alitsü totuyuba ya agütsü.

IDAN Chairman Abu Metha-i February 27, 2025 nü tepang o agi ashishitepba sülen NSCW ya tetsüng ajemok tenzüik. Iba sülen Commission yagi timtem ajurua aliba employees nungi kuli record asü aser Director General of Police (DGP), Nagaland nem ken o agütsü.

Naga Students' Federation (NSF)-ia Wilfred ya tangsa mapa nungi anenja atatsüla ta khanga liasü aser pai mapa tamajung inyak ta tai tonglokja liaka maneni sorkar keddangsür mapa inyakba nung tebilemstü tulu lir ta lematepa liasü.

Wilfred-i item tai tonglokja aliba ka kata magizük aser yimjak nunga sangdong balaka magütsü.

Nagaland Police ajanga Wilfred anema FIR ka zülüokogo aser iba ken o bushisüngdangtsü atema Special Investigation Team (SIT) ka tentetogo, ta April 12 nü metetdaksü.

Bodhbarnü totuyuba agütsüba nung, Wilfred mapa nungi khen atema anenja aliba (suspension) mapang pa indang headquarters

ya Nagaland Civil Secretariat, Kohima nung aliba Personnel and Administrative Reforms (P&AR) Department ya asütsü, ta shia lir.

Tapet keddangsür nungi jelja temelaba magie pa headquarters yutsür maotsü tenokdangba agütsüogo.

Suspension mapang Wilfred ya All India Services (Discipline & Appeal) Rules, 1969 indang Rule 4(1)(a) kübok mela aliba ama 'leave salary on half-average pay' den sako allowance aser iba den külemi dearness allowance angutsü, ta sangdong ajanga ashi.

Iba suspension osang ya Department of Personnel & Training, Ministry of Personnel, Public Grievances, and Pensions, Government of India dangi yokogo.

Wilfred anema ano danga ken o ka benoka lir.

2021 kum pa Noklak indang Deputy Commissioner inyakba mapang par official residence nung kidang yariteper tanur ana dak tim masüba mapa inyak ta tai tonglokja aliba dak sekdkakba nung ajemdaker SCPS Case No. 04/ 2021 kübok ken o ka benoka lir.

Court of Nagaland University nung S. Phangnon Konyak shimogo



Vice President of India aser Rajya Sabha Chairman, Jagdeep Dhankhar aser Nagaland nungi Member of Parliament, Rajya Sabha, S. Phangnon Konyak noksa nung angur. MP Konyak ya Court of Nagaland University nung shimokogo.

New Delhi, Monupii/May 22 (Agencies): Nagaland nungi Member of Parliament, Rajya Sabha, S. Phangnon Konyak ya Vice President of India aser Rajya

Sabha Chairman, Jagdeep Dhankhar-i Court of Nagaland University nung nominate süogo.

MP Konyak-i iba nomination asoshi pelaba lemsatap aser

Nagaland University Act, 1989 nung mela aliba ama University keddangsür den teka amteper maparen balala reprangshima inyaktsü ta ashi.

Takotet alumni tem anitetba nung Nagaland University yagi tongtipang shilem agia lir, shirnok bureaucrats, elected representatives, professionals aser wadang balala nung lenirtem adokdakja linük tenzüokogo aser maneni tenzüker.

Shisaliok tajung, tejakleni aotsü sentong yanglua stakeholders den teka amteper University jenjang ajungketba nung bendanga agütsür inyaktsü Konyak temulungtetba nung lir, ta sangdong ka ajanga ashi.

Nagaland University ya linük tesem balala nung aliba reju tajungtem den lirumedema akumtsü asoshi ajaki shilem agitsü nüngdaker, ta lai ashi.

ILP asangsang nung mapa kuma inyaktsü ayongzüker: NIPF

Dimapur, Monupii/May 22 (TYO): Dimapur, Chümoukedima aser Niuland nung ILP mapa kuma amshitsü Nagaland sorkari telemtetba agiba pela agizüker aser bhukuma nokdaker, ta Nagaland Indigenous People's Forum (NIPF) sangdong ka ajanga ashi.

Ibai asen lisopur wazüka ayutsü asoshi lir, kechiaser tekeraba nung mera tajung magira local nisungtem nütsüng tajemba akumtsü aser bendanger asoshi asenok alar ka ama akumtsü

mapang talangka mali.

Danga state kar nung sorkari temulung magütsüba yong local indigenous nisungtem ang pei states nung 'second class citizens' kumogo aser kasaji tia ajanga asen state asünger, koba kanga tejashitsüka lir, ta NIPF sangdong ajanga ashi.

Aser asenoki tang meinyakra aser Nagaland state nung iba tia ajurutsü.

Tarutsü putu wazüka ayutsü asoshi NIPF-i mapang talangka

nungi iba tebilemstü lemsatapa aser iba inyakyim mapa kuma amshitsü bhukuma arur. Dimapur Naga Students' Union (DNSU) aser danga CSOs shirnoksa asen lisopur temeden asoshi rara aser nokdaka arur, onoka parnok den dena lir.

Naga nunger tarutsü tia bilemdanga Nagaland sorkar dang ILP application kanga junga mittsü aser ozüng shidak amshitsü ayongzüker, ta NIPF sangdong ajangasa ashi.

K.G. Kenye-i APEN general conference maotsü



Dimapur, Monupii/May 22 (TYO): Association of Power Engineers Nagaland (APEN) general conference May 21 nü Engineer-in-Chief (Power), Kohima conference hall nung agiogo.

Sentong nung Minister, Power & Parliamentary Affairs, Nagaland K.G. Kenye alaketa jaoker liasü aser Secretary, Power Asangla Imti, IAS-ia shilem agia liasü. Sentong ya Vice President, APEN Er. Neiyie Neikha lenisüba nung agi aser Er. Moameren, Superintending Engineer (T)-i sarasademer tenzüka liasü.

Sentong nung o jembiba mapang Minister of Power, K.G. Kenye-i, pei mapa bendanga agüja inyakba atema Power Engineers tem dang pelaba lemsatep. Paisa, tanga state nung billing ya kanga tongtibang süa inyaker, kechiyong parnok Power Supply agi minprong

masür, saka Nagaland nungbo bill ajemtsüba aser energy conservation dang nungibo power supply restoration tongtibangba lir, ta ashi.

Rooftop Solar PMSG-MBY ya India sorkari benokba inyakyim tajung ka ta shia Kenye-i, iba scheme ajanga consumer tem ajangzüksü aser electricity bills ajemdaksütsü ta ashi. Paisa, state nung power Generation projects tem yanglutsü koda tongtibang iba indang lemsatep, kechiyong Nagaland ya power deficient State ka lir ta ashi.

Sentong nungsa APEN tir Er. Kasho Chishi-i, association züngsemtem dang mapa inyakba mapang Engineering ethics aser Engineering Culture wazüka ayutsü atema preamble mamatöksü ajungshi. Paisa, parnok nem khuret tulu nonglokja lir koba odangtetsüla ta ashi. Paisa, technology renloka aoba den meneptepa aintsü aser

kasa mapang nung Generation, Transmission & Distribution ta sector ajak nung resource adequacy dak sendakba nung roadmaps tejangja yanglutsü ajungshia liasü.

Kasa mapang nung Asangla Imti, Secretary (Power)-i, state nung Power Engineers tem ya parnok mapa aser proficiency atema kanga züngshir ta shia züngsemtem dang maneni meranga inyaksü ajungshia liasü.

Conference mapang 2025-2028 term atema ketdangpur tasentem shima liasü. Ketdangpur tasentemji: President - Er Mhonlumo Kikon; Vice President - Er. Kikrusenuo Chielie; General Secretary - Er. Y. Akito Sema; Joint Secretaries - Er. Kekhriesalhou Keyho & Er. Sungkumlemba Jamir; Treasurer - Er. Namheu Khathe Zeliang; PRO - Er. Neiteii Mero.

Sentong ya Er. N. Myingthungo Ngullie-i tepela o jembir tembanga liasü.

Tanurtem temeden dak sendakba nung sensitization sentong agi

Dimapur, Monupii/May 22 (TYO): Superintendent of Police (SP), Kohima kübok investigation aser police officers tem atema Child Rights dak sendakba nung anogo ka atema sensitization sentong ka ayongzüka agiogo.

Iba sentong ya Nagaland State Commission for Protection of Child Rights (NSCPCR) den longjemer DEF, Kohima-i ayongzüka aser May 22 nü SP indang Office Conference Hall, Kohima nung aqua liasü. Child protection laws aser inyakyim dak sendakba nung law enforcement personnel tem nem tangatetba tali agütsütsü nükjidong nung iba sentong ayongzüka agiogo.

Sentong nung shilem agirtem pelashishia agizükba mapang SP, Kohima, Teisovise Metha, IPS-i iba sentong takok angutsü imlaba lemsatepba den sentong ya tanurtem dak sendakba nung ken o achayangba mapang officers tem tali tedangshiba kümdaksütsü nükjidong nung yangluba lir ta ashi.

Sentong nungsa NSCPCR mendenbuba Alun Hangsing-i, tanur aser tetsürtem anema inyaksanghiba ken o tem takok ngua bentettsü atema police department aser NSCPCR na tsüngda tesendaktep tashi taitba küma yanglushitsü nüngdakba lemsatep. Paisa, NSCPCR-i taoba mapang bushisüngdangba nung shilem agiogo aser iba sentong ya law enforcement den tesendaktep aoshi jenjang ka agiba lir, ta ashi.

Hangsing-i, police mapa ya kanga meraket mapa ka saka

mapa tasak lir ta ashiba den, lokti ka yimjung nung alitsü aser tajangzüka kaa alitsü asoshi police professionalism aser integrity dak keta lir ta ashi.

Alun Hangsing-i ashiba agi, tetsür aser tanurtem anema inyakba dak sendakba nung public awareness aser legal frameworks melenshiogo aser iba atema police tem tangzüka tali akatsüla.

Tawa commission-i sangdongba advisory ka koba local osangkakettem nung adokogo iba nung police officers kati Indian Penal Code (IPC) aser Criminal Procedure Code (CrPC) amala general criminal law dang jangja alitsü masü saka Protection of Children from Sexual Offences (POCSO) Act aser Juvenile Justice (Care and Protection of Children) Act amala child protection legislations tongtibangtem meteta alitsü koda tongtibang iba indang lemsatepba pai lephsia jembia liasü.

Hangsing-isa, police den sensaksemba mapang tanurtem tetsüba nung masü saka sadem sadema sensaksemteptsüa jenjang agitsü nüngdakba lemsatep.

Kasa mapang nung NSCPCR züngsem Akumla Longchari-i, POCSO Act indang metetdaksü aser timtem lendong agi kongshir aliba tanurtem temeden wazüka toktsütsü aser parnok anisüngzüka pela toktsütsü atema police office temi tongtibang shilem agitsü aliba indang metetdaksü.

Laisa, ken o angashili FIR

benoktsü, ghonda 24 tsüngda Child Welfare Committee (CWC) nem osang agütsütsü, mapang shitak nung medical examinations agitsü aser tanurtem kümzüka toktsüba den osang meperokshitsü koda tongtibang iba indang lemsatepba liasü. Laisa, tashiyim agi ken o ashishiba, maitsü prokshiba, victim-blaming mesüra compromise mesüra mediation ajungshiba amala inyakyim nungi pila alitsü tekümdangtsü metetdaksü. Akumla-isa, Act kübok mapanglem indang metetdaksü, kong bushisüngdang ita ana tsüngda tembangtsüba aser trails küm ka tsüngda tembangtsüba shisema lir.

Akumla-i, officer tem dang tanur den apet inyakyimtem benshitsü ajungshi, kong oshi temela aser parnok amokmemerentsüa jembiba, tapet mapang nung tetsür officer tem amshiba aser statement tem mangaoka ayutsüba densema lir.

Sentong nungsa NSCPCR Legal Consultant Lichani Murry-i, Juvenile Justice Act indang metetdaksü. Laisa, Special Juvenile Police Units (SJPU) inyakyim indang rasa ashiba den police aser District Child Protection Unit (DCPU), Juvenile Justice Board (JJB), Child Welfare Committee (CWC), Child Helplines, aser District Legal Services Authorities (DLSA) amala tanga tanurtem kümzüka ayuba lokti tentettem longjemer inyaksü koda tongtibang iba indang lemsatepba liasü.

Associates for Performing Arts and Theatricals Silver Jubilee amungtsü

Mokokchung, Monupii/May 22, (TYO): Associates for Performing Arts and Theatricals Silver Jubilee May 25 nü Aongza Ki nung amungtsü. Iba sentong ya "Towards a Transformative Art" omen nung ajemdaker amungtsü.

APAT ya 2000 küm May 25 nü "Fraternity and Progress through Virtuosity" omen nung ajemdaker züngsem 14-i tenzüka liasü. APAT ya Home Deptt. Govt. of Nagaland, Registration of Society Act, 1860 nung züngoksema lir aser Nehru Yuva Kendra nung affiliate süa lir.

APAT nükjidongji sabang tapet agüja state nung sempet

aketba nisungtem aser theatrical productions ajungkettsü asoshi lir.

Nükdongtem rongnung ano artistic aser dramatic abilities anitettsü, social awareness atema lokti tentet ka ama i n y a k s a n g s h i t s ü , performances aser entertainment event tem ajanga lokti tsüngda kati ka taoba ta züngshitepba ajungkettsü, jilushi dak sendakba nung nüburtem ajungmesotsü, tekübokba jenjang nung aliba nüburtem ajungkettsü atema inyaksü aser sempet aketba lanurtem terenlok atema nongita yaritsü aser parnok ajungmesotsüba densema lir.

Mon Deputy commissioner-i Tizit semdang



Mon DC den ketdangsürtemi Sonari nung DC Charaideo, Dr. Neha Yadav den ajurutepba noksa nung angur.

Dimapur, Monupii/May 22 (TYO): Mon Deputy Commissioner Wennyei Konyak-i, Tizit semdanga GB, lokti tentet balala lenirtem aser tanga sorkar ketdangsürtem den conference hall, Tizit nung May 21 nü senden ka menogo.

Tang temzüng ozüng dak sendakba nung tensa aser kidanger state den yimjung nung alitsü atema inyakyimtem asadangba mapang DC-i sentepa aliba lokti dang tensa ajak nung süngjem ken o kanga junga angateta inyaksangshitsü mepeshi.

Paisa, mangatetteptem sensaksem aser tangatettep ajanga bentettsü koda tongtibang iba indang lemsatepba liasü.

Pai, social media amshirtem

meita alitsü nüngdakba lemsatepba den mejangjaba osangtem ajanga nüngdak makaba nung timtem adokdaksütsü akok ta ashi.

Senden nung pai sub-division nung aliba nüburtem dang alu balala ayimtsü ajungshi, kechiyong Tizit sub-division ali aser tsüngsang mopung ya tsünusenpongtsü balala atema kanga tapet ta ashi.

Senden amenba sülen DC den ADC Mon, ADC Tizit, SP Mon nungeri Sonari nung Charaideo, Assam Deputy Commissioner Dr. Neha Yadav den ajurutepa senden tatsüka mena liasü, koba kidanger district ana tsüngda tesendaktep akangshitsü asoshi liasü.



NABARD-i teyari agüja aliba Mobile Vans ana P. Bulte, GM, NABARD, Nagaland den Deputy Commissioner, Kiphire, Temsuwati Longkumer, NCS nati DC Office Complex, Kiphire nung May 22 nü tenzüksüogo. Iba sentong tembangba sülen DC, Kiphire-I RIPF Project benokba aser Rural Haat Foundation Stone azüngtsüba sentong agia liasü.



May 22, 2025 nü Operation Sindoor outreach kübok JD(U) MP, Sanjay Jha-i aniba teloki Japan nung tongti ketdangsertem ajurua senden amenba sülen tangokba noksa nung angur. Parnoki Japan foreign minister Takeshi Iwaya densema lenirtem aika ajurua senden amen.

Pakistan nung kiralongrartem lira India-i amaktsü: S Jaishankar

New Delhi, May 22 (Agencies): Brihostibarnü External Affairs Minister, S Jaishankar-i, tarutsü nung kiralongrartemi Pahalgam amakba ama maakra India-i Pakistan nung kiralongrartem amaktsü, ibayongji sorkari Operation Sindoor ya manen, ta metetdaksü.

Interview ka nung jembidang Jaishankar-i, "Iba amai maneni maakra onoki meyiptsütsü," ta metetdaksü.

Jaishankar tang South Holland yimtiba, Hague nung lir; pai Netherlands, Denmark aser Germany linüktem semdanger.

"Iba operation manener, kechiyong April 22 nü amakba ama maneni maakra onoki meyiptsütsü; onoki kiralongrartem amaktsü," ta pai metetdaksü.

"Pakistan nung kiralongrartem lira onoki parnok kong lidir yangji amaktsü. Anungji iba operation ano manen," ta pai metetdaksü.

April 22 nü kiralongrartemi

Pahalgam nung nisung 26 khasetba sülen May 7 nü India-i Operation Sindoor kübok Pakistan nung kiralongrar camp 9 amak. Iba sülen May 8, 9, 10 anogotem nung Indian military bases amaktsü merang, saka India nung sepaitemi nokdangteta liasü.

Tatema May 10 nü India Foreign Secretary Vikram Misri-i India aser Pakistan nati ali, tzüym aser anüng nung rara ajak anentsü bangjemba sangdonga liasü.

US Tir Donald Trump-i, linük ana tsüngda rara anentsüsa pai shilem agi, ta jembiba dak sendakba nung Jaishankar-i, "Kodang linük ana ya raradir alima linüktemi rara anentsü ajungshir aser tebilemtsü katsüba lemsateper. Ajisüaka injang yokba aser sepaitem inyaksangshi ajak anenbaji India aser Pakistan na tsüngda jembishinüa bangjemba ajanga liasü. US dang masü saka onok den tongtepratepa jembir ajak dang onoki, Pakistan nungertemi raraba anennüra

parnoki onok dang indangindanga ashitsüla, ta shiogo. Parnok general-i ozü general dangi call süa ibaji ashi, ibayongji rara anen," ta metetdaksü.

Jaishankar-i, Pakistan-i parnoki ozüng alema atsünga agiba Kashmir shilem meyipa agütsüra India-i parnok den ken o jembitsü melunga lir, ta metetdaksü.

China aser Pakistan arrtsülen security tensa ajanga India nung rongsenkettzüng kongshir asü?, ta asüngdangba langzüdang Jaishankar-i, rongsenkettzüng ainba aser security naji sendaktepa dang lir, ta ashi.

"Onok indang security tayongzükbatemji nenok (Europe) dang nungi tamajungba. Anungji onoki security ya tongti kümdaktsür. Nai security aser rongsenkettzüng azükaru na tsüngda ka mesüra ka shimtsü makok. Tanübo anaji sendaktepa lir ta nenoki agizükteter," ta paisa shisem.

J&K kübok Kishtwar nung sepai ka khaset

Srinagar, May 22 (Agencies): Brihostibarnü Jammu & Kashmir kübok Kishtwar district nung kiralongrartem den raradang sepai ka süogo.

Chhatru kübok Shingpora area nung kiralongrartem lir ta osang angazükba sülen sepaitemi iba tesemji mita ao. Osang angazükba agi, iba tesem

nungji kiralongrar pezü longbanga lir, aser iba tesem jagi sepai tali yoksemogo.

Army indang White Knight Corps-i X ajanga, "Kiralongrartem mita aoba mapang khatep tenzük aser tang tashi khatepdar. Khatepdang tasütait sepai ka kanga mejungi yiruba sülen akokba tashi

tajungtiba nung medical teyari agütsü, ajisüaka meküzmükteti süogo. Kiralongrartem maneni mita odar," ta metetdaksü.

"Op Trashi" ta ajaba operation nungji 2 Para, 11 Rashtriya Rifles, 7 Assam Rifles aser J&K Police kübok Special Operations Group (SOG)-i shilem agir.



May 22, 2025 nü Hyderabad nung Left parties nungi züngsemtemi Operation Kagar anenba sülen Maoists den senden amentsüla, ta takhangba agüja longkak aitba noksa nung angur.

India nungi telok anati Japan aser UAE nung ketdangsertem ajuru

New Delhi, Monupii/May 22 (Agencies): Operation Sindoor outreach atema shimtetba telok anati Brihostibarnü Japan aser United Arab Emirates (UAE) na nung tongti ketdangsertem ajurua Pakistan-i kiralongrartem pusemba lemsatepogo.

Operation Sindoor outreach atema India nung party balala nungi MP temi akümba telok tenet tentetogo aser parnoki nung kiralongrartem amenoker arrtsü adena kiralongraba indang lemsateptsü.

Shiv Sena MP Shrikant Shinde-i aniba teloki UAE nung Sheikh Nahyan bin Mubarak Al Nahyan aser Dr Ali Alnuaimi na densema tongti lenirtem aika ajurua senden aika menogo.

Item senden nungji India aser UAE nati longjemer kiralongra anema raratsü atema jembi.

UAE nung aliba Indian Embassy-i, "Kiralongra anema longjemer rarar" ta shia senden amendang tangokba noksa kar lemsatep.

Ano Japan nunga JD(U) MP Sanjay Jha-i aniba teloki Japan foreign minister Takeshi Iwaya ajurua senden amen. Ajioda Japan Foreign Minister-ia India-i kiralongra anema raraba pusemer, ta lemsatepogo.

Parnokisa taoba mapang Japan Ato kilonser Yoshihide Suga, security committee lenirtem aser policy think tanks nungi züngsemtem ajurua senden amen. Parnokia India-i kiralongra anema raraba pusemer, ta lemsatep.

Delhi Police-i Nepali nunger ka densema ISI züngsem ana apu

New Delhi, May 22 (Agencies): Brihostibarnü Delhi Police-i Delhi nung Pakistan nunger Inter-Services Intelligence (ISI)-i ketdangsüba sleeper cell nungi nisung ana puogo, ta metetdaksü.

ISI züngsem ana rongnungji kabo Nepali nunger Ansarul Mian Ansari lir ta jangjaogo.

Ketdangsertemi ashiba agi, taküm küm tetenzüklen Pakistan-i jena aotsü lia Delhi nung Ansari apu. Pa ket nung Indian security sepaitem dak sendakba documents kar liasü.

ISI tetuyuba kübok Ansari-i tongtibang osang aika compact disc (CD) ka nung bendena liasü.

Ano ISI züngsem kaji Jharkhand yimtiba, Ranchi nung alir Akhlaq Azam lir. Pa March ita nung pua liasü. Azam-i Ansari Delhi nung senzüsempongtsü atema yaritepa liasü aser mapang shia Pakistan ketdangser ka den tongtepratepa liasü.

May ita nung Ansari aser Azam na anema ken o benok aser tang tenaprongla Delhi nung aliba Tihar Jail nung puoka lir.

Ansari ya tamalen Qatar nung taxi driver inyaka aliba mapang nung ISI züngsem kati pa ISI nung anioka liasü. Iba sülen pa Pakistan-i anir oa ISI-i training agütsü aser Nepal ajanga Delhi-i yoka liasü.

Maoists-i ken o jembitsü mepishiba Centre-i magizüker: CPI(M)

New Delhi, May 22 (Agencies): Brihostibarnü CPI(M)-i Chhattisgarh nung sepaitemi Nambala Kesavarao densema Maoists züngsem 27 khasetba aitsü.

CPI(M) Polit Bureau-i sangdong ka ajanga, Maoists-i Centre dang ken o jembitsü atema aiben mepishio go saka Centre aser Chhattisgarh nung BJP-i aniba sorkari ken o jembiba ajanga mangatettep ken o bentettsü memelunger, ta metetdaksü.

"Ajisüaka parnoki meimchir dak mapetba mapa inyaka aika tepseter. Union home minister-i Maoists samatsütsü mapang atemzükba aser Chhattisgarh chief minister-i ken o jembitsü menügdak, ta jembiba ajanga parnok dak meimchir tepsetba nung jangratemba melungsentsü aliba sayur aser itemji democracy anema lir," ta CPI(M)-i metetdaksü.

Yimtenren party aika aser

senso tajung aikati sorkar dang CPI(M)-i ken o jembitsü mepishibaji agizükang ta sorkar dang mepishio go, ta Left party-isa metetdaksü.

"Onoki Maoists inakyimtem anemer, ajisüaka onoki sorkar dang parnok temepishibaji agizükang aser sepaitemi Maoists mita aoba ajak anenang ta mepishir," ta Left Party-i metetdaksü.

Bodhbarnü Chhattisgarh nung sepaitemi CPI (Maoist) general secretary Nambala Keshav Rao 'Basavaraju' ta ajasang densema Maoists 27 khaseta liasü.

CPI aser CPI(ML) Liberation-ia iba tatalokba aitsü aser iba tatalokba ya judicial ajanga bushisüngdangtsü takhangba agütsü.

CPI-i, ozüng kübok Maoist lenir aputsü melen tepsetba ya ajanga democratic telatetbatem anema inyakba tsütsü tebilemtsü akar, ta metetdaksü.



TIR YIMYIM YIMOBILEM (EDITORIAL)

DIMAPUR FRIDAY, MAY (MONUPII) 23, 2025

Mapa repranger malia na ?

Mokokchung nung Civil Hospital, koba dang tangbo Imkongliba District Memorial Hospital ta ajar, iba ya Nagaland nung mozü ki tejentem rong nung ka lir aser akhidang yangluba mozü ki bentoker tuluba aser tajungba yanglutsü asoshi mapa inyaksü "work order" 2018 küm agütsüba sülen, mapabo 2022 küm tenzük saka ano tang tashi merenemtet ajokshia alidang, Ao Kaketshir Mungdang (AKM) lenirtemi oa reprangdanger mapa inyakba aika nung temulung machiba osang metetdaksüba ji nübortem asoshi tejashitsüka lir. Iba temulung machiba o ya Nagaland Health & Family Welfare deparment-i kanga süokia ia agitsüla aser nübortem longkak ait matai yaktasa tim teinyaksü inyakadoktsüla. Angazükba agi, iba IDMH ya sen crore 14 shi endoka yanglutsü asoshi tenzükba mapa ka lir aser iba mozü kidang shiranger asoshi yipten 150 alitsü asoshi ki yangluba sentong nung enoka lir. Iba osang angashidangyongi, asen nükla nung, iba mozü kidang tetsür, tebur aser tanur –tain ajak asoshi temang shilem shia specialist doctor tajung aika den medical college aser Nursing College nungi tezüngdak purtem aser interns aika arua inyaka angur. Aji oda, tang yongi asen nükla nung Mokokchung district nung alirtem dang masü saka tanga district-tem nungi dena shirangertem arua IDMH tasenba nungji taneptsü ngur oyaa angur. Ajisüaka, iba mozü ki ya mapang shitak nung merenemba dang masü saka renemya aliba kijia osettsüset shitak amshia süa malia ta angashidang kanga jashir aser iba mozü ki yanglur contractor-i nübortem dang memeimi kanga mezüngshia inyakba angateter. Tangar state-tem nungbo contractor-tem rongnung toktepa mapa tajungtiba asütsü aser mapa shitak dang masü mapanga shitak nung renemtsü ta tangatetba nung inyaker, iba jagi tanga lima nungbo government-i inyakba kisüjensü aser lenmang aser apu yangluba ajak ya mapa inyaksü sentong, DPR, nung aliba ama shitak, takang aser topur jung-junga renemer amshiba angur. Asen lima nungbo ibaji meyipteper government meyong kisüjensüba mapatem yabo kodaser menua matemsü aser sentong nung aliba ama masü saka tilaba, tatsüba aser mesademba kuma yanglutsü ta bilemba nung temulung ka ser inyaker. Aji oda, Nagaland nung government contract anguba yabo hon atudak tesem ka yatet amai, küm asem nung renemtsüba mapa kaji küm ter nunga merenemtsü, kechiyong mapa jenjangji reprangshipet reprangshia teimba teimba kuma yanglushitsü aser idangji nübortembo akoksatsü saka karbo kanga ajangzüksü. Aji oda, kü nem inyaksü 'Work order' agütsüba mapa tenzük matemdang ozü ki tama renemadoktsü aser government mapajibo kümsülosü ajokshitsü. Ibaji mesüka asenok tenüng nung yanglutsü tenzükba IDMH ya mapa aser mapang shitak nung merenemtetba dang masü saka cement tamajung agia yangluba osang angashidangji, ki ajakji akusar bentoknüksüka jashia bilemer. Aji oda, cement tamajung amshiba nisungba jagibo, temetet, yin (iron rod)-a tamajung jenjang temelatiba amshia alitsüa akok. Item ajakji ki asür contractor-i anir par engineer aser supervisor-temi repranga inyakdaksübatem lir. Aji kecha balaka tesüngmangtsü mali, saka mozü ki patekaji yanglur ser nung Nagaland government kübok koba Engineering Wing mesüra department-i repranga yangludaktsüar na (?) ta asüabajang kanga tesüngmangtsüka lir ! Aji oda, contractor aser par engineer aser supervisor-tem dangji masü saka government department aser Engineering Wing kobai iba mapa repranger, parnokji tama tasüngdangba alitsüla. IDMH ama tongtibang aser ki tulu yangluba mapa ya shitak inyak asü meinyaker ta lokti tentettemi reprangtsü asü mesüra government nungi engineer yoka lir ? Aji oda, IDMH yangluba ya AKM ama lokti tentet kati mereprang nungbo cement masü ajung dang menoker yutsütsüba government tebilembabo lir asü asü ? Iba yabo nübortem mezüngshiba mapa ka lir. Yabo bushitsüla aser AKM-i akangba amaji kisüjensü mapa nung mongin nisung tangalen nungi anir arua cement aser yin ajak tendangtsüla aser ali dena tupoka ia 'foundation'-a reprangdangtsüla.

OLEMSABANG

Asen jabaso-jalaji asen noksa lir

~ L.Kika Pongener.

(Yashi adok nungi...)

Shirnoki Tsüngrem tsüngken tsübua pai mulongba lenmang nung jajar, tetezü, taküm junga liteter, parnokjibo Tsüngremi balaka moatsütsü. Parnoki züsentetba parnok achitsü, chirnur tajung moatsütsü aser taküm nung teti pelaa alitsü. "Nisung shia shibai Kibuba tsüngken tsübur, shibai pa lenmang nung jajar, pa tepelatsü. Kechiyong ne ket agi züsentetba nai achitsü, na tepelatsü alitsü, aser ne kidang kilung nung ne kinungtsüji tejang atangba tsükmenatsüdong ama alitsü, ne chirtem ne langbang meketa Oliv sungdong ama alitsü. Ajiang Kibuba tsüngken tsübuba nisungji yamaji alitsü" (T.Ken -128:1-4). Asenoki Tsüngrem tsüngken tsübua yimden, arogo aser lokti tenzükba mapa ajak nung ochishia indang-indanga tenzükra, Tsüngremi asen nem senmangtsü chirnur/semchir tajung moatsütsü, aser chirnurtemji alima asoshi nungdakba watsü-wabong tajung asütsü. Asenoki Tsüngrem tsübua chirnurtem tim lenmang nung anitetra, parnok asen nem meyipa teyari agütsütsü aser asenok iba maongka nungji pelaseta taso-a shizüka alitsü. Aji oda, ibaji Tsüngrem tsüngken tsübua alirtem asoshi temoatsü senmangji lir.

Ajisuaka, shirnoki Tsüngrem jashitsüsa, nuburi mepelatsüsa, yimden, arogo, lokti nung ochimashi tenzükra, aser yimden, arogo aser loktiliba nung pesaperong, mepetmesu aser telemsa adokdaksütsüsa timtem agüja tenzükra....Parnokjibo Tsüngremi memoatsütsü aser ashiko, merenshitsü. Aser karbo anjong tenari dang anu ayiba ama kanga tesasatsüka aser tapayutsüka anojungi arishi leptoktsü aser ano tia makar karbo tera dena atsütoktsü. Anungji asen dak nungi chirnur/semchisemnur tajung jakzüktsüsa aser sotettsüsa, asenok taküm alitsü kanga tongtipang. Aji oda, nisungibo kechi shidir shiang, tangari anguyonga manguyonga, asenoki ochishia, indang-indanga asüngteta lira, asen dak nungi chirnur/semchisemnur tajung jakzüktsü. "Kibuba dak amangang aser tajung inyakang; ajisura na ali nung taso shia alitsü" (T.Ken-37:3). Alima nung tatsüka alidang jangratema pela-a linura, mapa tajung inyakdi aser ochishia lidi. Shirnoki ochishia taküm junga alir parnok sülen teti temoatsü anidaktsü.

Tsüngrem o-i ashir, "Temeshipur senzüka yutsüba ni mangu; mesura pei chirtem meshi-metsüba ni mangu (T.Ken-37:25). Tsüngrem o-i ashibaji kanga dang shitak lir...Tsüngremi temeshipur kodanga senzüka meyutsütsü aser parnok dak jakzükba chirnurtem aser semchisemnurtem kodanga alaashia, timtema, sensaka, meshi-metsüa meyutsütsü tenangzükba tulu laishiba nung angur. Asenoki o agi aika rasa-a mejembiaka, asen jabaso-jala jagi asenji kechi'ar sayutsü aser asenok taküm koda lia aru, item ajakji parnok libaliroba taküm jagi sayutsü, kechiaser jabaso-jalatemji asenok tsürabur noksa lir. Anungji asenok dak nungi sungjang tajung alimai ongzüka achitsüsa, sotetdaksünura, semchisemnur tajung adokdaksünura.... Asenoki asen tenzükba yimden, arogo aser lokti ajunga nung ochishia, tangari asen dak tamang kaatettsüsa tenzükdi. Asenoki aseni inyakba mapa ajak nung nuburi temulung lemtettsüsa, tangari nguaka, monguaka, metetaka, memetetaka, ochishia inyakdi aser tenzükdi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



May 19, 2025 nü Pakistan Parliament nung anojungi tanurtem kibong kümdaktsüba nokdangtsü atema bill ka agizükogo. Iba ozüng tasenba kübok tetsür-tebur ajak kibong akümtsü atema tajemba agi arrshi küm 18 asütsüla. Iba bill agizükba ajanga Pakistan nung Khristan aser Hindu tsürtem anojungi kangshia kibong kümdaktsüba ajema akümtsü.

India nung anogo shia Khristantem anema inyaker: UCF

Monupii/May 22, 2025: Tawa United Christian Forum (UCF)-i report ka ajanga, 2025 küm mezüngbuba ita pezü (January-April) tsüngda India nung Khristantem anema inyakba tatalokba 245 liasü, ta metetdaksü.

Khristantem anema inyakba tatalokbatemji anogo sasep nung lemssära anogo shia Khristantem anema inyakba tatalokba anana lir.

India nung Khristantem anema inyakba tatalokba osangtemji UCF indang toll-free helpline service (1-800-208-4545) ajanga bendena liasü.

Delhi nung amenoka aliba UCF-i sangdong ka ajanga, "India nung anogo shia Khristantem anema inyakba tatalokba anana lir, aser iba osangji UCF helpline number 1-800-208-4545 ajanga metet," ta metetdaksü.

UCF indang Violence Monitor Report 2025 ajanga ashiba agi, tesüiba küm ter tsüngda India nung Khristantem anema inyakba tatalokbatem teimba-teimba dang akümer.

2014 küm India nung Khristantem anema inyakba

tatalokba 127 dang liasü; 2015 küm tatalokba 142 liasü, 2016 küm tatalokba 226, 2017 küm tatalokba 248, 2018 küm tatalokba 292, 2019 küm tatalokba 328, 2020 küm tatalokba 379, 2021 küm tatalokba 505, 2022 küm tatalokba 601, 2023 küm tatalokba 734 aser 2024 küm Khristantem anema inyakba tatalokba 834 liasü.

Taküm January ita nung Khristantem anema inyakba tatalokba 55 liasü, February ita nung tatalokba 65, March ita nung 76 aser April ita nung tatalokba 49 liasü. Khristantem anema inyakba tatalokbatemji state 19 nung atalokbatem lir.

January ita nungi April ita tashi nung Uttar Pradesh nung Khristantem anema inyakba tatalokba 50 liasü aser Chhattisgarh nung tatalokba 46 liasü. Karnataka nunga Khristantem anema inyakba tatalokba 22, Rajasthan nung 18, Jharkhand nung 17, Bihar nung 16, Andhra Pradesh nung 14 aser Madhya Pradesh nunga tatalokba 14 liasü.

Gujarat nunga Khristantem anema inyakba tatalokba 8,

Maharashtra nung 6, Punjab nung 6, West Bengal nung 11, Haryana nung 12, Himachal Pradesh nung asem, Uttarakhand nung ana, Odisha nunga ana, Delhi nung ka, Tamil Nadu nunga ka aser Telangana nung Khristantem anema inyakba tatalokba ka liasü.

UCF National Coordinator, AC Michael-i, "Linük tesem balala nung Khristantem anema inyakba kanga bulua akümba ya minorities temeden aser India temzüng anema lir. UCF-i item ama tatalokbatem osang bendenba mapang nung India temzüng kübok senso ajak kasa temeden wazüka ayutsü kanga nüngdaka kümogo," ta metetdaksü.

UCF-i, India nung item ama tatalokbatem ajanga talisa tribal Khristantem aser tetsürtem takoksa nguogo; January nungi April ita tashi nung item ama tatalokba ajanga tribal Khristan 30 aser Dalit Khristan trok takoksa nguogo, ta metetdaksü.

India tesem balala nung reshikangshi ajangshiba Khristantem yaritsü atema 2015 küm January 19 nü UCF helpline ya tenzüka liasü.

Mexico nung Khristantem sentong ka nung nisung tenet khaset

May 22, 2025: Mexico kübok Guanajuato jila nung Khristantem benjung sentong ka nung prangpong amer telok kati Khristan tenet khaset.

Hombarnep Santa Rosa de Lima cartel nungi prangpong amer telok ka jila tonga aruba sülen lokti dak injang khaloktsü.

Osang angazükba agi, prangpong amer telok balalai nightclubs aser bars amakba kanga bulua ataloker, ajisüaka Khristantem sentong tagidak mapang amakba yabo kanga bulua mataloker.

Open Doors World Watch list 2025 nung alima nung

Khristantem alitsü atema linük tamajungtiba 50 rongnung Mexico ya jenjang 31buba nung lir.

Iba List nung Islamic linüktem aser Communist sorkar aliba linüktem aika den Mexico tamajungba kümogo.

Mexico ya Khristan linük ka süaka ozüng alema tentetba telok balala timtem agütsüba ajanga mapang shia Khristantem takoksa angur.

Episcopal Conference of Mexico-i, "Mapang shia item ama tatalokbatem ajanga nübur ajak kongshir. Nüburtemi item ama tatalokba ya repranga

dangbo meyutsütsüla," ta metetdaksü.

Archbishop, Jaime Calderón-i, Santa Rosa de Lima aser Jalisco New Generation Cartel tsüngda raraba ajanga Khristantem aika süogo, ta metetdaksü.

Tenük kuli alirtemi ashiba agi, Hombarnü minute ishika tsüngda injang aika khaloktsüdang nisung tenet asü aser asürtem rongnung nisung anabo arrshi küm 18 ser tekübok liasü. Open Doors-i Mexico tensa aser yangji aliba Khristantem atema sarasademjang ta ayongzük.

ANOGO ABEN TSÜNGREM DEN

Ne Kangki Apuang - Mathi 16:24

Jenjang mesükshi ne kangkiji Tsüngremer mulungba lir. Kangki aputsübaji tashi metetba ka lir; ibai nai mokoktetsüba masü; ne tashi dak alia masü. Na temang nung timtem alitsü akok mesüra kibong nung tashi manga tanur alitsü akok mesüra senotzü tebilemtsü alitsüa akok, saka itemji nai aputsüba kangki den taitep. Nai ajuruba tia mesüra ne mapa nungi adokbaji kangki masü. Khristai tekümtet mapa inyakdang timatempa angati mulungsoa adenbaji ne kangki lir (Fil. 3:10). Pauli ashi pa timatempa nung pa pelar kechiaser pa timtem ajanga tangar Khrista dangi anir arutsü ta pai metetta liasü (Kol. 1:24).

Asenoki tangsa pei sasa azüoker Yisu sülen anidakner, saka nai tama ne kangki mapura, nai Khrista sülen manidaktetsü. Tsüngremer Tekümtet mapa timtem ajanga dang ataloktsüba mapatem lir. Tekümtet agütsütsü asoshi Khrista timatempa ama, Tsüngrem asoshi tangar Tekümtet dangi anir arutsü asoshi na timatemtsüla. Yisui Pa nütsüngtemi Paji Khrista ta memeteti tashi parnok den kangki indang mejembi (Matt. 16:21).

Nai Yisui Khrista ta mangatet tashi nai kangki timtemji maremzüktetsü. Kodang nai Khrista den tesendaktep bentetdir, Pai ne dang ne kangki indang jembitsü.

Kangki medeni Khistan yimsü mali. Nai timtem kecha magidang Tsüngrem den tesendaktep kanüra, nai Khrista yimya nung melitetsü. Na asoshi Tsüngremer mulungba nung kangki dena lir. Tamasa ne kangki apuang; idangji nai Pa sülen anidaktetsü.

Gaza Strip nung rara anentsü atema ghonda 24 lumia sarasadem

May 22, 2025: Gaza Strip nung rara anentsü atema Arogo lenirtemi ayongzükba ama May 21 nü Khristantemi ghonda 24 lumia sarasademogo.

Ano külen International charity telok Christian Aid-i UK sorkar dang Gaza nung rara anentsü atema arisanga inyaktsüla, ta akhanger.

Jerusalem nung aliba St George College nung Dean, Rev. Canon Richard Sewell leniba nung Gaza nung rara anentsü atema inyaktsü takhangba agüja campaign ka tenzükogo.

Dean Sewell-i, "Gaza nung nüburtem kanga timtembaji ajaki meteta dang lir. Nisungtemi tatalokbatem junga meteta liaka ibaji nokdangtsü aser temelenshi adoktsü atema kecha meinyaker," ta metetdaksü.

"Joko jembitsü mapang masü saka inyaktsü mapang tongogo, aser mapang melalutsüla. Ayawara tensa anendaktsütsü aser rara anendaktsütsü atema alima nung tashi tulu alirtemi inyaktsüla. Gaza nung timtemba nüburtemi chiyungtsü telatet ka dangbo menügdaker. Parnok taküm tanaben asentenshitsü atema parnoki teti atema yimjung nüngdaker," ta paisa metetdaksü.

"Onoki alima nung campaign ka ayongzüker: Gaza atema lumia sarasademang. Ayawara ajanga süadoktsüsa aliba tai maket nübur meyirjang aika pusema onoki lumir. Onoki

tangartem danga iba campaign nung shilem agitsü aser takhangba agütsüba den külemi May 21 nü lumia sarasademtsü ayongzüker. Onoki ajak dang iba campaign nung shilem agitsü ajungshir," ta Rev. Sewell-isa metetdaksü.

Christian Aid indang Middle East policy & advocacy nung tongti, William Bell-i, "Gaza nung rara ajanga nütüing aika kanga mejungi kongshir. Gaza nung Palestine nungertem atema UK sorkari teinyaktsü tim meinyaker ama Christian Aid-i bilemer. Joko ita 18 dak tali Israel nunger sepaitemi bomb amshia amaker, nisung jenti jenshiogo, nisung 50,000 dak tali tepsetogo aser kiojen shilem 75 raksaogo. Tang Palestine nungertemi yaseta asüba chirnurtem tasü mang remtsüdar," ta metetdaksü.

Paisa, "International mongintemi, Gaza nung nisung pongu shia nungi kabo aya-tzüra tia nung lir ta shiogo. Ano külen Israel-i maneni Gaza telungi bener aiba teyari balala nokdang. Onoki UK sorkar dang tim teinyaktsü inyaktsü aser teti atema yimjung bener arutsütsü mepishir," ta metetdaksü.

Mongolbarnü Israel Ato kilonser, Benjamin Netanyahu-i, " Hamas teloki pua alirtem chiokra aser raraba hadir yura asüngsa rara anentsü akok," ta sangdongogo.

AO OSHI ANGAZÜKDAK:

TANÜ ANGAZÜKTSÜBA OJANG



Tenari

(adj) telonglong (round, circular)

* Jemben ama süngjang tenari tapu aika lir.

Tenarong

(n) temang nung angashitsü tentsüba shilem (ears)

* Tenarong teti merüka ayutsüla.

OLONG PAITEP # 7159

1			2		3		4		5	
6		7								
					8					
9				10						
						11				
			12							13
	14							15		
					16					
			17							
								18		
19										

TIPIEN

2. Teburtemi tejak nung awaba
6. T____em
8. Tzüik ayudak
9. Nüngdakba dang timba
11. Züina ao
12. Yangi tzu angur
14. Tangar dang nungi tali
16. Senyong masü
17. Oadokdi
18. Tzü tarok
19. Yimtaklir aikati iba ya ki den
külemi yanglusemer

LANGTSÜNGLEN

1. Temejangdak
3. Nisung ka mapa inyaksü nübo
4. Azüntsü asoshi mejemba
5. Tesangwa agütsüba
7. Tila masü
10. Tebenjem tetsür chanu
11. Tekolak nung inok
12. Tetsüngda
13. Tangar inyakba ka inyak
14. Tim masü ta ashi
15. Asalendong
16. Tanü dangtsü

OLONG PAITEP # 7158 TELANGZÜBA

TIPIEN :

1. Telok, 4. Aluru, 6. Ozüing,
8. Emk, 9. Kin, 10. Teti, 12. Süir,
13. Jen, 14. Ola, 16. Talak,
17. Mazük.

LANGTSÜNGLEN :


1. Tenükjang, 2. Luden, 3. Kiochtsü
5. Lenti, 7. Tajangzüik, 11. Teronem
12. Sempa, 13. Jahaz.

NAI-A YA METETTER MA

INDIAN PREMIER LEAGUE NUNG RUN TIMTIBA YANGLUBA ASAYAR 10:

1. Virat Kohli
Run: 8509 / Team: Royal Challengers Bengaluru
Asaya: 263 / Innings: 255
2. Rohit Sharma
Run: 6933 / Team: Mumbai Indians, Deccan Chargers
Asaya: 269 / Innings: 264
3. David Warner
Run: 6565 / Team : Delhi Capitals, Sunrisers Hyderabad
Asaya: 184 / Innings: 184
4. Suresh Raina
Run: 5528 / Team: Chennai Super Kings, Gujarat Lions
Asaya: 205 | Innings: 200
5. MS Dhoni
Run: 5439 / Team: Chennai Super Kings, Rising Pune Supergiant
Asaya: 277 | Innings: 242
6. KL Rahul
Run: 5187 / Team : Royal Challengers Bengaluru, Punjab Kings, Delhi Capitals, Sunrisers Hyderabad, Lucknow Super Giants
Asaya: 144 | Innings: 135
7. AB de Villiers
Run: 5162 / Team : Royal Challengers Bengaluru, Delhi Capitals
/Asaya: 184 | Innings: 170
8. Ajinkya Rahane
Run: 5017 / Team: Kolkata Knight Riders, Chennai Super Kings, Delhi Capitals, Rajasthan Royals, Mumbai Indians, Rising Pune Supergiant /Asaya: 197 | Innings: 182
9. Chris Gayle
Run: 4965 /Team[s]: Royal Challengers Bengaluru, Kolkata Knight Riders, Punjab Kings
Asaya: 142 | Innings: 141
10. Robin Uthappa
Run: 4952 / Team[s]: Royal Challengers Bengaluru, Kolkata Knight Riders, Chennai Super Kings, Rajasthan Royals, Mumbai Indians, Pune Warriors India
Asaya: 205 | Innings: 197.

Churachandpur nung Meitei nunger anema maloktsüba poster agintsü



Imphal, Monupii/May 22 (Agencies): Manipur kübok Churachandpur district nung Bodhbarnü tesempatap adokdaksütsüsa osang keter aliba poster ana jila teyong nung maloktsüba sülen Security forces aser civil police-i agintsüogo. Social media nung iba osang ayimsünga prokshia mepetmesü adokba sülen iba jenjang ya agia liasü.

Poster nung ya Meitei nunger anema olen ka zülutsür liasü, koba Raj Bhavan-i tetuyuba agütsüba sülen agina liasü, ta ketdangsürtemi metetdaksü.

Poster nung ya "nai Meitei nungertem den külemi litettsü ta amangra na matu rongnunga balaka," ta banner tulu ana nung zülur ka Tuibong nung Mini Secretariat anasa aser ka Tuibong Traffic Point nung tokja liasü.

Tsökchitep adokdaksütsüsa osang zülur mataksüba ajanga nüburtem atsüa aru aser online nung iba anema nokdaka liasü, ibayongji ketdangsürtemi takaratiba nung jenjang agitsüa aküm.

Bushisüngdangba sülen mejangjaba nisungtemi Ukhrul district nung tang agia aliba

Shirui Lily Festival indang banner shitoktsür iba tesempa prokshiba poster ya maloktsü ta jangjaogo. Benjung dak sendakba poster ya kasa Mini Secretariat anasa maloktsür liasü.

Tang tashi nung iba poster maloktsüba indang kija mesüra telok kati danga nangzüka mali. Law enforcement ketdangsürtemi ashiba agi, poster maloktsürtem bushiteta aputsü atema jenjang agidar, koba kin o kin tsüngda mangatettep adokdaksütsü atema agiba jenjang ka ta kanga süoki ia agir.

MZP-i proxy tesayurtem anema jenjang agitsü takhangba agütsü

Aizawl, Monupii/May 22 (Agencies): Mizoram nung kaketshir lokti tentet tongtiba, Mizo Zirlai Pawl (MZP)-i Bodhbarnü state sorkar dang proxy mesüra substitute tesayurtem hire asüba tesayurtem anema jenjang agitsü mepeshia metetdaksüogo.

Osangbenertem den sensaksemba mapang MZP tir H. Lalthianghlima-i ashiba agi, district trok nung state sorkar meyong school 14 nung tesayur 22-i parnok tenüng nung proxy tesayur yuja lir.

Paisa, MZP-i state meyong school tem nung iba amala ozüing alema inyaksangshiba inyakyimtem nokdangtsü atema bushisüngdangdar aser jenjang agia arudar, ta ashi.

Taoba mapanga parnoki nüburtem dang, tesayur kari danga proxy tesayur hire süa lira osang agütsütsü aser flyer

amshia metetdaksütsü shiogo, ta pai ashi.

Proxy employee tem hire asüba tembangdaksütsü atema sorkari jenjang agiba atema tenüsang agütsüba den Lalthianghlima-i ashiba agi, MZP-i sorkar dang proxy tesayur maneni hire asürtem anema jenjang tapet agitsü mepeshiba den iba anema jenjang agitsü atema June 13 nü tatembangbuba anogo ama latettsüogo.

Ken o dak sendakba nung school education department ketdangsürtemi kecha telangzüba magütsü.

2023 küm December ita sorkar tentetba sülen Chief Minister Lalduhoma-i anir Zoram People's Movement (ZPM) sorkari sorkar tenzükertemi parnok melena tangar ayuba inyakyim anendaksütsü tenangzüikba agütsüba den iba amala

inyakyim benschirtem dang taoba küm January ita tashi nungbo pei department dang kechiba parnoki iba jenjang agi iba indang rasa ashitsü tetuyuba agütsüogo.

Ketdangsürtemi ashiba agi, sorkar tetuyuba dak ajemdaker department balala nungi employee 3,600 dak temai parnoki parnok tenüng nung proxy staff hire asüba metetdaksüogo.

Parnoki ashiba agi, school education department nung proxy employees (1,115) timtiba liasü aser parnok sülen health & family welfare department nung 624 aser power and electricity department nung 253 liasü.

Proxy ayuba atema kuli aika agütsüogo saka parnok 2000 dak temai temang nung timtem aliba kuli agütsü aser employee 703-i kidang tebilemtsü aliba indang kuli agütsü.

Manipur police-i PLA züngsem trok puogo

Imphal, Monupii/May 22 (Agencies): Manipur Police aser central security forces temi tenokdangba agütsür aliba Revolutionary People's Front (RPF) indang armed wing People's Liberation Army (PLA) indang züngsem asem Imphal West aser Thoubal districts kübok tesem balala nungi puogo.

PLA züngsem asem apuba sülen taoba ghonda 48 tsüngda PLA/RPF züngsem trok puogo, ta police source kati metetdaksü.

Sepaitemi pua alirtem ya Huyam Chitaranjan Singh, Lairenlakpam Joychandra Meetei aser Khundrakpam Robasko Singh ta jangjaogo.

Mongolbarnü Kakching district meita aoba mapang PLA züngsem Nongmaithem Raju Singh, Yumnam Sunil Singh aser Kshtrimayum Opendro Singh apuba sülen parnok asem ya pua liasü.

Ken o ashishiba mapang itangitertemi osang bendenba dak ajemdaker Imphal West kübok Pal Ahanbi Canchipur tesem aser Thoubal kübok Khangabok Sorok Wangma meita oa liasü.

Ketdangsürtemi ashiba agi, PLA züngsem trok ya state kübok district balala nung rakzükrakdemba nung densema liasü.

Meita aoba mapang sepaitemi 9 mm carbine

machine gun ka den magazine asem aser injang pongu, AK rifle injang 24, .303 light machine gun indang magazine ka, .22 rifle injang 16 aser .22 pistol indang injang ti ngutetogo.

Ketdangsürtemi s detonators tenet, mobile phone ti, sen 1,060 den wallet ana, Aadhaar card tem aser gari ana puogo, koba ozüing alema inyaksangshiba maparen nung amshi asütsü ta amanger.

PLA/RPF ya Manipur nung telungpur telok tejentiba rongnung ka lir, shirnoki küm lir dak tema state nüjiso atema rara arudar. Manipur ya India Union nung 1949 küm adenba sülen iba telok ya tenteta liasü.

N. Korea warship sayadang timtem ajuru, Kim-i ketdangsür arütsü

Pyongyang, Monupii/May 22 (Agencies): Warship tasen ka sayaba mapang lendong tulu aruruba mechi North Korea lenir Kim Jong Un-i ketdangsürtem arütsü, ta state media ajanga ashi.

5,000 tonne destroyer ya Chongjin yimti nung sayaba mapang anojungi transport cradle ya alua iba rong indang hull kanga sashia raksa aser iba tatalokba ya "inexperienced command and operational carelessness" ajanga lir ta aitsü, ta Korean Central News Agency (KCNA) ajanga Brehostibarnü ashi.

Iba timtem ajuruba sülen Kim-i kanga junga asadang aser timtem ya züngzünger masüba, mapa shidak meinyakba aser unscientific ajanga lir aser tatok

magütsütsü ta ashi.

Iba timtem adokdaksüba ketdangsür den taruba workers' Party of Korea indang central committee senden nung jembitsü ta ashi aser aibelen asoshi parnok aitsü, ta KCNA ajanga ashi.

Iba rong ya June indang party indang central committee senden menepa yanglutsü totuyuba agütsü aser iba rong yanglushiba ya asangsang nung mapa inyaksüba tebilemtsü kisüing masü saka yimtenren tebilemtsü ka lir, koba linük tashi den indang-indanga sendaktepa lir ta ashi.

South Korea indang mitkaria Pyongyang-i iba rong sayaba mapang tamakok ajuru amai lir aser tera makep, ta ashi.

North Korea nung

ketdangsür temi pei mapa nung metokmeperi ajuruba asoshi nangzükbä aiben majangshir, kong Kim'er kibong ya Tsüngrem ama tushir aser akumtsübor.

April 25 nü nok-nü tashi tulutiba aliba "new multipurpose destroyer" sayaba nung Kim adenba sülen iba osang temai adoker.

Iba rong sayaba mapang Kim-i rong ya asen maritime sovereignty kumzüka ayutsü tashi keta yanglu aser advanced maritime power yangerba tsütsü tetenzük mera tongtipang ka lir ta tushia liasü.

"Putu tasen indang rong mezüngbuba asoba sangdongtetba ya khonang tulu ama ni bilemer," ta Kim-i iba rong sayaba mapang shia liasü.

Israeli embassy staff ana Washington, DC nung khaset



Washington, Monupii/May 22 (Agencies): United States nung Israel indang embassy staff züngsem ana US yimtiba nung Jewish museum kima khaset.

Iba lendong ya Washington, DC nung aliba Capital Jewish Museum anasa Bodhbar aonung 9:00 ako (par mapang) meta atalok, ta ketdangsür temi ashir.

Israel foreign ministry ajanga asür ana ya Yaron Lischinsky aser Sarah Lynn Milgrim lir ta sangdongogo.

Metropolitan Police Department tekolak Pamela A Smith-i ashiba agi, ketdangsür temi iba lendong agütsür südi ta temulung melemi alisang arishi küm 30 tain Elias Rodriguez puogo, shiba Chicago, Illinois nungi lir.

"Lendong matalokdang temulung melemi alisang ya museum kima oli aruli ta senzüba angu. Pai nisung pezü alidaki ao aser handgun ka

agiteter injang khaloktsü," ta Smith-i osangbener senden ka nung ashi.

Rodriguez ya pua bener aodang "Free, free, Palestine" ta ayimten, ta Smith-i ashi.

Smith-i temulung melemi alisang nükjidong rasaa mashi.

Washington, DC Mayor Muriel Bowser-i osangbener den jembidang lar administration-i asen yimti nung azüdokshi mesüra tesempatep nem tatok magütsütsü ta ashi. "Asenoki kiralongra mapa kecha tatok magütsütsü, aser tarutsü anogotem nunga asenok külemi nokdaksü aser anti-Semitism tatok magütsütsü ta osang tejangja sangdongtsü," ta Bowser-i ashi.

Israel ambassador to US, Yechiel Leiter-i Yaron Lischinsky aser Sarah Lynn Milgrim ya kibong akumtsü sentong liasü ta ashi.

"Taruba hopta Jerusalem nung asüngdangtsü tebilemba nung asangubai tan hopta ring

ka alitsür liasü," ta Leiter-i ashi.

German diplomatic osang ka ajanga ashiba agi, asür rongnung tebursang ket nung German passport liasü.

German Chancellor Friedrich Merz-ia sangdong ka nung nisung ana khasetba ya aitsü aser Foreign Minister Johann Wadephul-ia iba osang angashia aoksar ta ashi.

US Tir Donald Trump-i asür kinungertem den asükhu lemsatepogo aser ibai Jewish nunger anemba nung ajemdaker inyak ta ashi.

Federal ketdangsür temi iba tatalokba bushisüngdang südar aser aibelener nem obendang shidak agütsütsü, ta US Secretary of Homeland Security Kristi Noem-ia ashi.

Israel Ato Kilonser Benjamin Netanyahu-ia iba lendong atalokba osang angashia aoksar ta ashi aser alima tesem balala nung aliba Israeli missions tem dang security akangshitsü totuyuba agütsüogo.

Bangladesh Army Chief-i December tashinung election agitsü ayongzük

Dhaka, Monupii/May 22 (Agencies): Humanitarian corridor aser elections asoshi osang balala angashiba mapang Bangladesh Army Chief General Waker-Uz-Zaman-i Bodhbarnü Durbar senden nung ketdangsür den jembia liasü.

Iba senden nung Chef of Army Staff (CAS) ajanga "bloody corridor" ta jembiba

khenyongi magizüktsü ta ashi. Pai December ita election agitsü ayongzük aser linük tarutsü tia ya unelected interim administration ajanga masü saka elected government ajanga lemtettsü tongtipang ta ashi.

Bangladeshi army-i kecha tensa nunga iba ama corridor memelatsü, ta Army Chief-i jangja jangja ashi.

Maneni National Security Advisor Dr. Khalilur Rahman-ia, "Ni ya jangja-jangja shiner - asenoki shinga dena corridor indang mejembi aser shinga dena mejembitsü," ta ashi.

Ajisüaka Army Chief aser NSA tsüngta jembishinü yimya ajanga Nobel prize angur Muhammad Yunus tekolak sür aliba interim government telungzük nung temulung



**OFFICE OF THE
MOLUNGYIMSEN LAISHIR TELONGJEM**
P.O. Tuli Town - 798618, Dist, Mokokchung : Nagaland

TENÜNGSANG AGÜTSÜR



Asür Wb. Nehemiah Aier aser asür Wt. Yashimenla na jabaso **Dr. N. Moatemjen Ao**-i Sam Higginbottom University of Agriculture, Technology and Sciences, Prayagraj U.P. India nungi *Doctor of Philosophy in Theology (Ph.D) (History of Christianity)* 2025 takok tulu ngutetba asoshi Molungyimsen Laishir Telongjemi tepela tenüngsang agütsür aser iba temoatsü tulu asoshi asen teyanglur Tsüngrem tenüing tali asanger.

Tsüngremi ne taküm, kibong aser wadang maneni moajangma.

Sd/- Mr. Merangkaba (President MLT)	Sd/- L. Ajungla Aier (Secretary MLT)
---	--

AO THEOLOGICAL ASSOCIATION
33 BUBA KÜMSEM INTI MUNGDANG



"Tsüngremer Nükmet Loishir"

ROGONÜ 2025 AMUNGÜ
MONUPII 23 MONUPII 25
TESENTEPDAK : MOKOKCHUNG BAPTIST AROGO

Tagidak sentong (Live Streaming) youtube channel nung reprangtettsü : Mokokchung Baptist Arogo.

**OFFICE OF THE
CHANGTONGYA YIMSENTSÜR TELONGJEM**
CHANGTONGYA TOWN
P.O. CHANGTONGYA - 798613
Date: 22nd May 2025

TENÜNGSANG AGÜTSÜR

Changtongya Yimsentsür Telongjem, Changtongya Town ajanga Wb. C. Moatemsu Longkumer aser Wt. Moayangla Pongen na jala **Kr. Kisangwala Longkumer**-i Central Board of Secondary Education (CBSE) kübok GD Goenka Signature School, Sohna Road, Gurugram nungi Class XII (Humanities) nung 98% ngua takok khonang tulu bener arutsü nung tenüngsang agütsür.

Tsüngremi la taküm aser shisaluyimba nung maneni moajangma.

Sd/- TOSHIRENLA President	Sd/- WATIRENLA General Secretary
---	--

Changtongya Yimsentsür Telongjem, Changtongya Town

mechitep tali akumba sayur. totuyuba nung inyaksü

Osang ajanga ashiba agi, renema lir, ta osang ajanga CAS-i interim government ashir.

Army Chief-isa telok adenshia azüdokshiba mesüra ozüng mali ama armed forces temi metoktsütsü ta jangja-jangja ashi, anungji tarutsü anogotem nung nüburtem sunepa alitsü asoshi ozüng tesashiba amshitsü amai

Officer corps tem General Waker-Uz-Zaman den ajang-ajanga nokdaka lir aser nüngdak dang süra pa ajiteter.

India U-19 team nung Vaibhav zügoksemogo



Vaibhav Sooryavanshi

Monupii/May 22, 2025

(Agencies): Junior Cricket Committee-i India India U-19 team England nung oa asayatsü aliba asayamung atema arishi küm 17 tain Mumbai opener Ayush Mhatre captain asütsü shimogo.

Iba tour nung England U-19 team den 50-over warm-up asaya ka asayatsü aser iba sülen Youth One-Day series nung asaya pongu aser multi-day match ana asayatsü

India team nung asayar 16 shimba nung arishi küm 14 tain Vaibhav Sooryavanshi-a densema lir, shibai tang asaya aliba Indian Premier League

(IPL) nung kanga junga asaya arudar.

Rajasthan Royals nungi tenetben asayaba mapang Sooryavanshi-i run 252 yangluogo aser pa indang strike rate 206.56 lir.

Sooryavanshi, shibai taoba ita arishi küm 14 junga liasü, pa taoba küm auction nung sen crore 1.1 agi alizükba sülen pa ya April ita IPL nung asayartem rongnung tanobusang aküm aser mezügbuba asaya mezügbuba ball nung pai six ka züka tenzük. Iba sülen pai ball 35 nung century ka yangluogo, ball 15 nungi run 40 aser Royals puri CSK wicket trok agi

akokba asaya nung ball 33 nung run 57 yanglua liasü.

Kasa mapang nung Mhatre-ia junga asaya arudar. CSK nungi asaya trok nung pai run 206 yangluogo, kong Royal Challengers Bengaluru (RCB) den asayaba mapang ball 48 nung run 9 yangluba densema lir.

Asayamung tenzük dang Mhatre aser Sooryavanshi naprongla asayatsü imla maliasü. Ajisüaka asayartem yiruba ajanga tena asayatsü asoshi maongka angu. Sooryavanshi ya Rajasthan Royals' captain Sanju Samson yiruba ajanga asayatsü asoshi maongka angu aser Mhatre ya Ruturaj Gaikwad yiruba melen shima liasü.

India U19 Squad: Ayush Mhatre (Captain), Vaibhav Sooryavanshi, Vihaan Malhotra, Mauliyarajsinh Chavda, Rahul Kumar, Abhigyan Kundu (Vice-Captain & WK), Harvansh Singh (WK), R S Ambrish, Kanishk Chouhan, Khilan Patel, Henil Patel, Yudhajit Guha, Pranav Raghavendra, Mohammed Enaan, Aditya Rana, Anmoljeet Singh

Standby Players: Naman Pushpak, D Deepesh, Vedant Trivedi, Vikalp Tiwari, Alankrith Rapole (WK).

Archer yiruba ajanga Windies den ODI masayatettsü



Seamer Jofra Archer

Monupii/May 22, 2025

(Agencies): Seamer Jofra Archer teka tachichilen jemtsüba yiruba sülen England team West Indies den one-day international asayamung ka asayatsü aliba nung shilem magitettsü.

Indian Premier League nung Rajasthan Royals nungi asayaba mapang Archer yiruba sülen iba asayamung nung masaytsü, koba May 29 nü tenzüksü.

Arishi küm 30 tain asayar ya ODI asayamung sülen asayatsü aliba T20 asayamung atema-a meshim, kechiyong pa India A den asayatsü.

Anogo pezüzü asayatsü aliba asaya ya May 30 aser June 6 nungi asayatsü, anungji Archer mezügbuba asaya

nungbo masayatettsü, koba pa atema küm pezü tsüngda mezügbuba red-ball cricket asaya ka asütsü liasü.

Pa 2021 küm February ita England atema Test asayaba mapang teberem aser tekatsüla yiruba ajanga timtema aruogo.

Lancashire indang left-arm seamer Luke Wood-i ODI squad nung Archer melenogo. Pa T20 team nunga züngoksema lir.

Wood-i tang tashi nung ODI ana dang asaya lir aser wicket ka danga agia mali. Arishi küm 29 tain asayar yagi T20 asaya pongu nung wicket ti agir lir.

West Indies den asayatsü aliba ODI asayamung ya tongtibang lir, kechiyong England team captain tassenba Harry Brook lenisüba nung tang

mezügbuba asayatsü lir.

West Indies den asaya atema England squads:

ODI: Harry Brook (c), Gus Atkinson, Tom Banton, Jacob Bethell, Jos Buttler, Brydon Carse, Ben Duckett, Tom Hartley, Will Jacks, Saqib Mahmood, Jamie Overton, Matthew Potts, Adil Rashid, Joe Root, Jamie Smith, Luke Wood.

T20: Harry Brook (c), Rehan Ahmed, Tom Banton, Jacob Bethell, Jos Buttler, Brydon Carse, Liam Dawson, Ben Duckett, Will Jacks, Saqib Mahmood, Jamie Overton, Matthew Potts, Adil Rashid, Phil Salt, Luke Wood.

Schedule & fixtures

May

29: First ODI, Edgbaston (d/n) (13:00 BST)

June

1: Second ODI, Cardiff (11:00 BST)

3: Third ODI, The Kia Oval (d/n) (13:00 BST)

6: First T20 international, Seat Unique Riverside, Chester-le-Street (d/n) (18:30 BST)

8: Second T20 international, Seat Unique Stadium, Bristol (14:30 BST)

10: Third T20 international, Utilita Bowl, Southampton (d/n) (18:30 BST).

HI-i FIH Pro League European Leg atema asayar sangdongogo

Monupii/May 22, 2025

(Agencies): Hockey India-i FIH Hockey Pro League European leg atema asayar 24 tenüing sangdongogo, koba Netherlands kübok Amstelveen aser Belgium kübok Antwerp nung June 7 nungi tenzuka asayatsü.

India team Netherlands den Amstelveen kübok Wagner Stadium nung June 7 aser 9 nü asaya ana asayatsü lir aser iba sülen parnok kasa tesem nung Argentina den June 11 aser 12 nü asayatsü.

Maneni India team Antwerp-i aotsü aser Australia den June 14 aser 15 nü asayatsü aser June 21 aser 22 nü hosts Belgium den asayar tembangtsü.

India team dang tasembuba nung lir. Iba asayamung Indian leg nung asaya ti nungi pongu akokba sülen India team-i point 15 ngua lir.

Team India head coach Craig Fulton-i ashiba agi, "tangbo onoki team nung asayar tejentem timba shimnüa liasü aser asayar shimer aliba dak kanga temulung asür."

"Team kanga junga training agia aruogo aser onoki takokba tashi meranga asaya-a Pro League akoktsü merangtsü," ta pai shisem.

"Iba ya World Cup atema qualification asayamung ka asü nung onoki takokba tashi point aika ngua onok jenjang junga yanglushiner," ta Fulton-i ashi.

"Iba asayamung nung tang tashi nung onok draw khien danga süa mali aser onok tamakok angubatam ya draw südaktsütsüla aser shootout asayatsüla, ajita asünungdang onoki ngunüba result monguaka board nung points bo ngutettsü," ta coach-i shisem.

"Maneni penalty corner nung goal idaktsüba jenjang melenshitsü nüngdaker. Onok nükjidong tejangja lir aser tang iba asayamung nung ajangzüksü merangtsü," ta pai ashi.

Team India:

Goalkeepers: Krishan Bahadur Pathak, Suraj Karkera.

Defenders: Sumit, Amit Rohidas, Jugraj Singh, Nilam Sanjeep Xess, Harmanpreet Singh, Jarmanpreet Singh, Sanjay and Yashdeep Siwach

Midfielders: Raj Kumar Pal, Nilakanta Sharma, Hardik Singh, Rajinder Singh, Manpreet Singh, Vivek Sagar Prasad, Shamsher Singh

Forwards: Gurjant Singh, Abhishek, Shilanand Lakra, Mandeep Singh, Lalit Kumar Upadhyay, Dilpreet Singh, Sukhjeet Singh.

Malaysia Masters: Srikanth quarter-i iogo; Prannoy tsükogo



Kidambi Srikanth

Popov den asayatsü.

Ajisüaka India nunger asayartem rongnung HS Prannoy bo tanabuba round nung Japan nunger asayar Yushi Tanaka-i tsükdaktsüogo.

Brehostibarnü tanabuba round nung HS Prannoy-i kanga meranga asaya saka 9-21, 18-21 agi Tanaka mekoki liasü.

Kasa mapang nung Popov-i India nunger asayar Ayush Shetty 21-13, 21-17 agi tsükdakja quarterfinal-i iogo.

India nunger rongnung ano Sathish Karunakaran-a tsükogo. Pa Toma adianu aser doubles partner Christo Popov-i 14-21, 16-21 agi koka liasü.

Tarep asaya nung Tanisha Crasto aser Dhruv Kapila nata quarterfinal-i iogo. Tenati terep temeyoktep asaya nung France nunger tarep Lea Palermo aser Julien Maio na 21-17, 18-21, 21-15 agi koka liasü.

Tena quarterfinal nung China nunger tarep Jiang Zhen Bang aser Wei Ya Xin na den asayatsü jangjaogo.

Monupii/May 22, 2025
(Agencies): India nunger badminton asayar tejen Kidambi Srikanth-i Brehostibarnü Malaysia Masters tebur kija asaya tanabuba round nung Ireland nunger asayar Nhat Nguyen koka quarterfinal-i iogo.

Tanabuba round nung world number 33 Nguyen den asayaba mapang Srikanth-i asaya ya minute 59 nung 23-21, 21-17 agi koka liasü.

Srikanth, shiba mapang talangka junga masayatetba ajanga tang world rankings nung jenjang 65buba nung lua lir, pa quarter final nung France nunger asayar Toma Junior

BILEMDANGANG

"Na tesülenibo lepa motettsü saka tejaklenibo otettsü."